

四庫全書

史部

欽定四庫全書

增補武林舊事卷六

宋周密原本

明朱廷煥補

湖山勝槩上

南山孤山

南山路

補十九條

自豐樂樓南至暗門錢湖門外入赤山烟霞石屋
止南高峰方家峪大小麥嶺並附於此

豐樂樓

舊為衆樂亭又改聳翠樓政和中改今名淳祐間
趙京尹與憲重建宏麗為湖山冠又甃月池立秋
千梭門植花木構數亭春時遊人繁盛舊為酒肆
後以學館致爭但為朝紳同年會拜鄉會之地林
暉施北山皆有賦梢趙忠定柳梢青云水月光中
烟霞影裏湧出樓臺空外笙簫雲間笑語人在蓬
萊天香暗逐風回正十里荷花盛開買箇小舟山
南遊遍山北歸來吳夢窗嘗大書所賦鶯啼序於

壁一時為人傳誦

湖堂

舊在聳翠樓側又有集賢亭今並不存

呂洞賓祠

舊傳洞賓嘗至此

靈芝崇福寺

錢王故苑以芝生其間捨以為寺故名靈芝高宗
孝宗凡四臨幸有浮碧軒依先堂亦為新進士會

拜題名之所 朱靜佳有詩云黃金匝地小橋通
四面清平納遠空雲氣長扶天子座日光浮動梵
王宮殘碑幾字莓苔雨清磬一聲楊柳風沙鳥不
知行樂事背人飛過夕陽東

顯應觀

祀磁州神崔府君六月六日生朝遊人甚盛咸淳
間改昭應今歸靈芝寺舊有蕭照山水及蘓漢臣
畫壁今不復存

府君名子玉唐潞陽令卒為神靖康間高宗為康
王避金寇走鉅鹿馬斃望南獨行值路三歧莫知
所向忽有白馬導之暮至祠下有土馬赭汗如雨因
假寐廡下夢神人以杖擊地促其行白馬復導至斜
橋谷會耿南仲來迎馬忽不見及即位復夢神將
白羊饋之曰得孝子實兆孝宗由是累朝宗奉

西湖志

楊郡王府上船亭

聚景園

詳見御園門

靈應堂

俗呼包道堂

寶蓮院

紫霄宮解院

寶成院

舊名
釋伽

興福院

永隆院

慧光尼菴

張循
王府

省馬院船步

內有正覺
超化二院

長橋

長橋宋誌俗名雙投橋西湖竹枝集 元富春馮

士頤詞曰與郎情重得郎容南北相看只兩峰請

看雙投橋下水新開兩朶玉芙蓉註言常有情人

雙投於橋故長橋名雙投

郎寶七修類纂

妙淨院

寶德寺

楊和王重建元三
衛建聖節道場

希夷道堂

劉篔簹衣建於南屏園左今移於此

真珠園

有真珠泉高寒堂杏堂水心堂御港曾經臨幸今
歸張循王府

南園

中興後所剏光宗朝賜平原郡王韓侂胄陸放翁
為記後復歸御前改名慶樂賜嗣榮王與芮又改
勝景有許閒堂和容射廳寒碧臺藏春門凌風閣
西湖洞天歸耕莊清芳堂歲寒堂夾芳豁望矜春
鮮霞忘機照香堆錦遠塵幽羣紅香多稼晚節香
等亭秀石為山內作十樣錦亭并射圃流杯等處
弁陽翁詩云清芳堂下千株桂猶是韓家舊賜
園白髮老翁和淚說百年中見兩平原 又云舊

事淒涼尚可尋
斷碑空卧艸深深
凌風閣下槎牙
樹當日人疑似
水沉

雷峰顯嚴院

郡人雷氏所居故名雷峰
錢王妃建寺築塔名皇
妃塔或云地產黃皮遂謔為黃皮塔
山頂有通玄亭望樓

舊名中峰穹窿迴映亦曰迴峰
林逋詩中峰一
徑分盤折上幽雲
夕照前村見秋濤
隔岸聞長松

標古翠疎竹動微薰自愛蘇門嘯懷賢事不羣

西

湖志

晉寧寺

又名白蓮有鐵塔一石塔二

雲濤觀

淨相院

舊名瑞相有無盡意閣娛客軒一段奇軒幽深可喜今皆不存

上清宮

葛仙鍊丹舊址道士胡瑩微祖築菴鄭丞相清之

曾此讀書淳祐中重建賜今額理宗御書清淨道院

甘園

內侍甘昇園又名湖曲曾經臨幸至今有御愛松望湖亭小蓬萊西湖一曲後歸趙觀文又歸謝節使弁陽翁詩云小小蓬萊在水中乾淳舊賞有遺踪園林幾換東風主留得庭前御愛松

御船坊

理宗御舟在焉

淨慈報恩光孝禪寺

孝宗嘗臨幸山曰南屏有慧日峰舊名慧日永明
太宗賜壽寧院額孝宗御書慧日閣有千佛閣五
百羅漢堂理宗御書華嚴法界正徧知閣等額梁
貞明大鐵鍋存焉畫壁作五十三叅等寺後菴宇
甚幽大抵規模與靈隱相若故二寺號南北山之
最蘇東坡詩云卧聞禪老入南山淨掃風塵五百
間其宏壯自昔已然今益侈大矣

周顯德元年錢王俶建號慧日永明院迎衢州道
潛禪師居之潛嘗欲從王求金鑄十八阿羅漢未
白也王忽夜夢十八巨人隨行翌日道潛以請王
異而許之始作羅漢堂宋建隆初禪師延壽以佛
祖大意經論正宗撰宗鏡錄一百卷遂作宗鏡堂
太宗改賜壽寧院熙寧中郡守陳襄延禪師宗本
居之屬歲旱湖水盡涸寺西隅甘泉出有金色鰻
魚遊焉因鑿為井寺衆千餘飲之不竭名曰圓照

井南渡時燬而復興僧道容實鳩工焉

西湖志

寺為祖宗功德院側有五百尊羅漢別創一田字
殿安頓裝塑雄偉殿中有千手千眼觀音一位尤
為精製其第四百二十二位阿濕毘尊者獨設一
龕用黃羅為幙幙傍置籤筒一座其像側身偃蹇
便腹斜目覩人而笑臨安婦人祈嗣者必詣此炷
香默禱以手摩其腹云有感應日積月久汗手加
於泥粉之上其腹黑光可鑒

李有古杭雜錄

南山昭慶院

惠照寺

後為齋宮
今歸淨慈

南屏御園

正對南屏
又名翠芳

南屏興教寺

舊名善慶有齊雲亭清曠樓米元章書琴臺及唐人磨崖八分家人卦中庸樂記篇後人於石傷刊右司馬溫公書六字其實非也

廣法院

齊王功德院
有清曠亭

法因院

景獻太子殯所有
古鐵塔錢王井

寶林院

莊文太子殯所舊
有總持有可賦軒

赤山殯宮

舊瑞龍寺後為安穆成恭慈懿恭淑四后殯所今為熾盛光寺

修吉寺

舊瑞龍寺移于此有西湖奇艷

正濟寺

又名普門

法雨寺

舊名木心入改雲龍有趙清獻楊無為題名等

安福尼寺

極樂尼寺

高麗寺

舊名惠因寺湖山間惟此寺無勅額元豐間高麗

王子僧統義天入貢學賢首教於此因施金建華嚴閣有易菴期懺堂皇姑成國公主殯所

玉岑山

相傳其山產玉故潤媚異常孤峯秀拔層巒繚繞中有古木倒植森翠凌冬崖上玉岑二字許采書

山門玉岑宋理宗書

西湖志

惠因橋

秦少游龍井紀游所謂濯足于惠因澗即此

廣果寺

開化尼寺

六通慈德院

舊名德塔

卷六

法興寺

保福院

長耳相院

舊名法相

定光菴

有定光泉

永慶院

延長真如院

延壽山

淨梵院

舊名瑞峯

崇教院

石屋洞

大仁院有石菴天成石羅漢其洞後又一洞名蝙蝠洞

蝙蝠洞

洞高敞虛朗行迤二丈六尺狀如軒榭可布筵几
其底邃窄通幽闇然窅室周錫羅漢五百十六身
仇仁近詩誰劈空青露石坳遊龍伸臂下南高
鬼神穿鑿地脉碎風雨支撐天柱牢峭壁蒼苔侵
佛髻懸崖滴乳濕僧袍伽藍間是香山叟燈暗祠
荒沒野蒿

西湖志

水樂洞

院名西關淨化即滿覺院山孝宗時賜李聿慈

明殿賜楊郡王後歸賈平章山石奇秀中一洞嵌
空有聲以此得名有聲在堂界堂愛此留照獨喜
玉淵漱石宜晚諸亭及金蓮池

洞在烟霞嶺下洞傍錢氏建有西關淨心院宋淳
熙六年以賜內侍李秉仍建佛宇巖石盤峙洞壑
虛窈泉味清甘聲如金石熙寧二年郡守鄭獬名
之曰水樂洞後二年蘇子瞻來為倅遂賦詩云

君不學白公引涇東注渭五斗黃泥一鍾水又不

學哥舒橫行西海頭歸來羯鼓打梁州但向空山
石壁下愛此有聲無用之清流流泉無絃石無竅
強名水樂人人笑慣見山僧已厭聽多情海月空
留照聞道磬裏東入海遺聲澗谷含宮徵聲奏未
成君獨喜不須寫入薰風絃縱有此聲無此耳

丙

湖志

澗覺院

舊名圓興今在水樂洞嶺傍

石佛接待菴

烟霞洞

清修院有象鼻石佛手巖石羅漢東坡留題

歸雲菴

寧宗時水庵清禪師坐禪石窟中聞南峰鐘鳴遂
大悟今改永興菴

關真人道院

小龍井

井側有
龍王祠

南高峰塔

榮國寺有白龍祠五顯祠險峻甚於北峰中有墜石相傳云昔有道人鎮魔於此又有潁川泉

峰在南北諸山之界羊腸詰曲松篁葱蒨非芒鞋布襪努策筇杖不可登也塔居峰頂晉天福間建宋崇寧乾道兩度崇修元季毀舊七級今存五級塔中四望則東瞰平蕪烟消日出盡湖山之景南頰大江波濤洄洑舟楫隱見杳靄間西接巖竇怪石翔舞洞穴邃密其側有瑞應泉巧若鬼工北矚陵

阜陂陲曼衍箭樞叢出麩麥連雲山椒巨石屹如
峩冠者名先照壇相傳道者鎮壓之所峰頂有鉢
孟潭潁川泉大旱不涸大雨不盈潭側有白龍洞

龍王祠今廢

西湖志

方家峪

自方家峪至冷泉峪慈雲嶺泥路嘉會門外至大
慈山龍山

遇真道院

悟真道院

崇真道院

廣教院

號小南屏

褒親宗壽寺

在鳳凰山劉貴妃功德有鳳凰泉瑞應泉松雲亭
觀音洞筆架池偃松交枝檜壁間有陳公儲畫龍
甚奇 弁陽翁詩云翟羽鸞綃事已空奉華遺事
對高松宮斜鳳去無人見且看門前粉壁龍奉華

劉妃閣名

西蓮瑞相院

黃貴妃功德

地藏尼寺

金史卷之八十一 卷六

慈光尼寺

張府功德

廣慈院

舊名廣福

寶藏院

有烏龍井錢武肅廟碑今錢氏五王廟在焉

寧親廣福院

陳淑妃香火院雖小而幽邃可喜

福全尼寺

廣嚴院

舊名妙嚴有徐正節墓

淨教院

蔡貴妃殯所

安福禪院

內侍陳都知香火名小陳寺

水月寺

路口有靈囿石

崇教院

舊名薦福有珍珠泉

華津洞

趙冀王府園水石甚奇勝有仙人棋臺

西林法惠院

舊名興慶錢王建有雪齋秦少游記東坡詩

冷水峪

梯子嶺

慈雲嶺

淨明院

郊壇齋宮有易安齋梅巖高孝兩朝御和詩滿山
皆椽栒有江月菴節爲亭

龍華寶乘院

本錢王瑞萼園捨建有傳大士塔并栢板門槌猶
存有温公祠堂題名

天華寺

鏡清禪師道場舊名千春龍冊有頤軒妙因樓化

生池

感業寺

舊名天龍有
木觀音像

勝相院

舊名龍興千佛有五丈觀音像二并閣釋迦丈六

金身像

大通院

舊名顯明

天真院

舊名登雲臺有靈化洞

龍華山

有石如龍與兩石龍寺接

下石龍淨勝院

上石龍永壽院

舊名資賢石崖刻仁宗佛牙贊

郊臺

錢王郊臺亦近焉

道林院

舊名普濟

大慈寺

般若院

寶惠院

舊名普濟

錢王墳

文穆忠獻二王墳在此

長慶崇福院

皇祖叔太師和王功德

窰池

一名烏菱池

聖果寺

在包家山

真覺院

萬名奉慶有東坡瑞香花詩

包家山桃花關

桃花甚盛舊有蒸霞二字春日遊人甚多 張涑

有詩云龍飛鳳舞舊時山仙嶺桃花更作關武陵
源上流水急王母臺前日月間霞色紛紛披絳樹
春光煜煜照紅顏若教禹錫重遊此應道玄都觀

裏還

張文東集

法雲寺

舊名
資崇

大慈山

舊有廣福
金書院額

虎跑寺

舊傳性空禪師居此無泉二虎跑地而出蘇東坡
詩云虎移泉眼起行脚龍作浪花供撫掌

乾溪寨

小楊寺

香嚴寺

小麥嶺

飲馬橋前後至龍
井止九溪十八洞

道人山

有石
洞

飲馬橋

地名放
馬場

旌德顯慶教寺

咸淳甲戌冬改旌德襲慶慈明太后香火方丈有
軒曰雲扉後山有泉石甚奇曰林泉有清壑凝紫
靜雲等諸亭

南山禪關

舊名龍井路今
又改南天竺

仰妃墓

吳越錢
王妃

梅坡園

楊郡王園
又名總秀

靈隱觀

寧宗朝張知宮荆御書沖隱菴淳祐中道士范善

遷重建賜名今額今菴在觀右而觀改仁壽院矣
太清宮

寧宗時朱靈寶守固建楊太后書道德經石幢有
歲寒軒養性凝神二堂後為賈貴妃功德今改觀
音院

松庵

楊郡
王府

宗德顯慶院

舊名棲真章稟質夫功德後為永王祈王殯所

章司徒墓

名得象樞使棠之祖棲真院碑可考

翁五峰墓

名五寅
字寅賜

徐典章墓

名申字幹臣
號青山翁

強金紫墓

名至字幾聖今石羊虎猶存其子文憲公淵明墓
在西溪鄉諸子亦多附此

陳拾遺墓

唐人歲久莫可名
字在積慶山下

水壑書堂

金樞密淵號永壑嘗作書堂于此因葬焉積慶永
清二山在後平鼎山在左湖山在前凡錢塘城邑
江湖之勝皆近在几席間乃南北二峰中之最高
一山也有君子天一二泉理宗御書積慶山怡顏
藏書農圃以賜又賜功德寺名曰積慶教忠後不
及建而止

贊寧塔

天聖間
葬此

靈石山

薛開府墓

名居正
謚貞顯

崇因報德院

有靈石泉又名歲寒泉甚清高宗嘗臨幸院與積慶山後永清院皆薛開府功德此院已廢獨靈石塔猶存

淨林廣福院

開府楊慶菴祖墳上人呼為上楊菴有松關南泉芳桂亭姜白石與恬朴翁等四人來遊詩云四人松下共盤桓筆硯花壺石上安今昔興懷同此

味老仙留字在潺湲後為演福寺遂廢

無垢寺

舊名無著乃無著禪師道場舊在石人嶺慶元中
韓平原以寺為生墳遂移寺于此嘉定十一年重
修有鴉雞巖仙人臺清音軒偃松下有茯苓因名
泉為茯苓泉後為演福寺遂廢

崇恩演福教寺

寶祐丁巳重建咸淳中改禪寺德祐後復為教寺

賈貴妃殯所周漢國端孝公主祔焉舊山門有妙
莊嚴域及生清淨心亭真如亭諸天閣羅漢閣

雞籠山

金鐘峰

褚家坎

漢末褚盛族
舊有居此者

白蓮院

相傳晉摩訶
師講經于此

風篁嶺

嶺多蒼筤篠簜風韻淒清至此林壑深沉迥出塵
表流淙活活自龍井而下四時不絕嶺故叢薄荒
密元豐中僧辯才淬治潔楚名曰風篁蘇子瞻訪

辯才龍井送至嶺上左右驚曰遠公過虎溪矣辯
才笑曰杜子有云與子成二老來往亦風流遂作
亭嶺上名曰過溪亦曰二老子瞻紀之詩云日
月轉雙轂古今同一丘惟此鶴骨老凜然不知秋
去住兩無家人事爭挽留去如龍出水雷雨捲潭
湫來如珠還浦魚鼈爭駢頭此生暫寄寓常為名
實浮我比陶令媿師為遠公優送我過虎溪溪水
常逆流聊使此山人永記二老遊大千在掌握寧

有別離憂

小水樂

福邸園

二老亭

後改德威舊在風篁嶺頭東坡辯才往來於此皆有詩今移於龍井祠下

龍井

吳赤烏中葛稚川嘗鍊丹於此在風篁嶺上巖壑林樾幽古石竇一泓清澈翠寒甘美可愛雖久旱

不涸石上流水處其色如丹遊者視久水輒溢人
去即減其深不可測相傳與江海通有龍居之每
禱雨必應或見小蟹班魚蜥蜴之類井傍有惠濟
龍王祠

陳寺丞墓

名剛中紹興中以言事與張狀元九成連坐謫知
虔州安遠縣而卒後葬風篁嶺沙盆塢

胡侯墓

名則知杭州
廟在墓前

劉菴

孝宗朝劉婉容殯
所今歸龍井寺

龍井延恩衍慶寺

辯才故地舊名報恩看經院後改壽聖東坡書額
猶存又改廣福元祐以來諸賢留題甚多及東坡
竹石廡宣仲枯木寺前有過溪橋又名歸隱橋又
名二老橋寺有方圓菴寂照閣清獻趙公閒堂訥
齋潮音堂滌心沼鏡清堂冲泉薩埵石辯才清獻
東坡三賢祠辯才塔諸天閣山有獅子峰

葉苔磯墓

元索字唐卿詩人

五雲山

中有真際院巖上有天井大旱不竭

九溪十八澗

大麥嶺

法空寺

舊名
資慶

南資聖院

漢王
墳

花家山

盧園

內侍盧允昇園景物奇
秀西湖十景所謂花港

觀魚即
此也

淨安院

內侍董朱
臣香火

崇真宮

皆為女冠今
為永淨尼寺

茆家步

獨角門

淨嚴廣報院

內侍董永
仲功德

隆興菴

楊寺
解院

黃泥嶺

水陸菴

楊寺解院後
名慶安院

妙心寺

水竹塢

錢塘湧金清波三門皆濱湖而湧金介其中且余家
去郭門不盈咫尺杖芒鞋尋山問水必自湧金出出
門稍南為洪襄惠公兩峰書院又南為靈芝崇福律
寺經清波門過流福水橋濱湖為夾字港折而南為
茶坊嶺西南過長橋為南屏山淨慈禪寺萬工池寺
後有蓮花洞居然亭寺前之右為雷峰塔左為藕花

居倪尚書墓南屏西為九曜山法因寺今即其地為
發祥祠西南為太子灣折而南為石屋嶺石屋洞蝙蝠
洞大仁禪寺又南過烟霞嶺為水樂洞烟霞洞磴
道曲折而上為南高峰榮國禪寺太子灣西為玉岑
山其對為赤山惠因澗惠因講寺寺北為六通律寺
法相律寺赤山之陰有筍箕泉合於惠因澗山北為
三台山于肅愍公墓三台前為栗山八盤嶺周思得
真人墓三台北為小麥嶺其地宜麥故名有東嶽行

宮靈應廟永福橋即飲馬橋也嶺西支境可通大麥嶺蓋積慶山之陂陀迤邐者又西為大麥嶺傍為花家山永福橋折而西北為靈石山元道士張伯雨及明尚書徐公墓在焉又西北為雞籠山風篁嶺一片雲石楊梅塢獅子峰延恩衍慶講寺龍井神運石嶺北為棋盤山龍井上為老龍井南為九溪西為十八澗自南屏山而南過錢糧司嶺折而西為廣澤禪寺舊名甘露有泉甘澄可啜又西南為大慈山定惠禪寺

虎跑泉又西南為崇先襲慶禪寺真珠泉自清波門折而南為筆架山方家峪祀宋太學徐應鑣忠節祠褒親崇壽教寺又西南為華津洞梯雲嶺折而南為慈雲嶺永壽禪寺嶺南為龍山上為天真禪寺登雲臺下為天真書院天龍禪寺天華禪寺勝相禪寺龍華禪寺宋籍田稍南為妙因山吳越國文穆忠獻兩王墓稍北為玉厨山善惠禪寺妙因之陽為江文昭墓自清波門折而東南為鳳凰山其麓為萬松書院

八蟠嶺留月玉壺二臺又東經鳳山門折而南過萬松坊為報國講寺宋行宮又南折而西為梵天講寺梵天北更折而西迴繞松磴為勝果禪寺月巖巖左為中峰右為宋殿前司營又西為棲雲菴南為包家山山川壇壇左為正崇菴右為三一菴又南為大慈禪寺此南山之勝也

張涑南山名勝紀

西湖三堤路

蘇公堤自南新路直至北新路口小新堤自麴院至

馬蝗橋

蘇公堤

元和中東坡守杭日所築起南屹北橫截湖面夾
道雜植花柳中為六橋九亭 坡詩云六橋橫絕
天漢上北山始與南屏通忽驚二十五萬大老葑
席捲蒼烟空後守林希榜之曰蘇公堤章子厚詩
云天面長虹一鑑痕直通南北兩山春 張洎蘇
堤行樂詩云長湖開玉鏡雙堤夾彩虹氣橫萬頃

上光搖一水中柳分隋岸綠桃借漢林紅路入烟
花界山圍錦繡叢淡粧西子態玉樹麗華容葉度
歌姬扇楊穿俠客弓酒依金谷飲遊與曲江同今
日樂相樂年光不易逢 又觀錢塘令王龍江蘇
堤植挑柳詩云本以花為縣重將錦散堤五栽彭
澤左萬樹武陵西偶值談移玉因知氣若霓看來
無異谷行處已成蹊每見春猶在何期路易迷攀
條言是綬執葉亦為珪霞取中流映烟從綠水棲

棠陰誰不愛寧獨有周黎

窮居集

第一橋

港通赤山教場名映波

旌德觀

元係定香寺舊址寶慶間京尹袁韶改建為觀有
西湖道院虛舟雲錦二亭今復為定香寺

先賢堂

名仰高祠許由以下共四十人刻石作贊具載事
迹中以寶慶初巴陵之事謂潘閻有從秦王之嫌

遂去之及節孝婦孫夫人以下五人今止三十有
九人焉中有振衣古香清風堂山亭流芳花竹縈
紆小山曲逕今歸旌德堂宇皆廢

第二橋

通赤山麥嶺
路名鎖澗

湖山堂

旁有水閣
尤宏麗

三賢堂

祠白樂天林和靖蘇東坡後有三堂曰水西雲北
月香水影晴光雨色後有小亭曰虛舟曰雲錦

第三橋

通花家山
港名望仙

第四橋

通茆家步港名歷
堤北新路第三橋

施水菴

名圓通有石臺
籠燈以照夜船

雪江書堂

胡賢良
旣所居

新水仙王廟

龍王祠與葛
嶺者為二

崇真道院

賈平章建後有
閣今改為僧寺

松牕

張濡
別墅

第五橋

通麴院港名東浦
北新路第二橋

第六橋

通耿家步港名跨
虹北新路第一橋

孫太初詩云十里飛花送酒卮六橋兒女蹋春詞

無人會得漁翁意獨立晴湖照影時 張洙蘇堤

六橋詩云湖心一徑長南北架虹梁十二中流影

三千水月塘桃分兩岸色柳接數堤芳今日平津
賞宜開杜預觴

小新堤

淳祐中趙京尹與憲自北新路第二橋至麴院築
堤以通靈竺之路中作四面堂三亭夾岸花柳比
蘇堤或名趙公堤

履泰將軍廟

有天澤井葛仙翁所植虬松將軍錢塘人姓孫名

顯忠仕吳越時淳熙中趙興權京尹禱雨有驗奏
聞因勅封天澤侯

楊園

楊和王府和

永寧崇福院

又名小隱寺元係內侍陳源適安園近世所歌菊
花新曲破之事正係此處獻重華宮為小隱園孝
宗撥賜張貴妃寺前有澗曰雙峰又曰金沙

裴園

裴禧園誠齋詩云岸岸園亭傷水濱裴園飛入水
心橫傷人莫問遊何處只揀荷花開處行

喬園

喬幼
間園

史園

史屏石
徽孫

資國園

舊名報國有東坡書隱
秀齋趙令峙德麟跋語

淳固先生墓

斌姓宋號庸齋
師晦菴先生

馬蝗橋

孤山路

西陵橋

又名西林橋又名
西冷橋又名西村

元張與詩云紅藕花深逸興饒一雙鷓鴣避鳴橈
曉風涼入桃花扇臘酒香分椰子瓢狂容醉歌明月
上美人歌斷綠雲消數聲漁笛知何處疑在西泠
第一橋 劉邦彥湖上花開報劉廷美詩云白鷗
遙待酒船來芳艸汀洲去復回為惜杏花寒勒住

西泠昨夜一枝開

西湖志

孤山

舊有栢堂竹閣四照閣巢
居閩林處士廬今皆不存

孤山巖介湖中碧波環遶勝絕諸山唐宋間樓閣

參差彌布椒麓 白樂天西湖晚歸回望孤山寺

贈客詩云柳湖松島蓮花寺晚動歸橈出道場盧

橘子低山雨重棕櫚葉戰水風涼烟波淡蕩搖空

碧樓閣參差倚夕陽到岸請君回首望蓬萊宮在

水中央 又孤山寺遇雨詩云拂波雲色重灑葉

雨聲繁水鷺雙飛起風荷一向翻空濛連北岸蕭

颯入東軒或擬湖中宿留船在寺門 林君復孤

山寺詩云低處凭欄思渺然孤山塔後閣西偏陰

沉畫軸林間寺零落棋枰葑上田秋景有時飛獨
鳥夕陽無事起寒烟遲歸更愛吾廬近祇向重來
看雪天 入孤山寫望詩水墨屏風狀總非作詩
除是謝元暉溪橋裊裊穿黃落樵斧丁丁隔翠微
返照未沉僧獨往長烟初淡鳥橫飛南峰有客鋤
園罷閒倚林間忘却歸 栢堂宋僧志銓作陳文
帝天嘉二年有植兩檜於孤山寺中至宋時猶存
其一號陳朝檜志銓作堂其側曰栢堂與竹閣連

屬蘇子瞻作詩紀之云道人手種幾生前鶴骨
龍姿尚宛然雙榦一先神物化九朝三見太平年
忽驚華厦依巖出乞與嘉名到處傳此栢未枯君
記取灰心聊伴小乘禪後孝宗嘗書此詩勒石

竹閣白樂天作在孤山寺中杭人因貌公像而祀
之今為四賢堂址其詩云晚坐松簷下宵眠竹
閣間清虛當服藥幽獨抵歸山巧未能勝拙忙應
不及閒無勞別修道只此是玄關蘇子瞻詩云海

山兜率兩茫然古寺無人竹滿軒白鶴不留歸後
語蒼龍猶是種時孫兩叢却似蕭郎筆千畝空懷
渭上村欲把新詩問遺像病維摩詰更無言 僧

道潛四照閣懷少游學士詩云猿鳥投林已寂然
芭蕉過雨小樓前雲移絕壁中間破月自遙峰缺
處圓照坐不須紅炬蠟可人惟有蕙爐烟校讐御
府圖書客疇昔還同此夜禪 俱西湖志

四聖延祥觀

有帝太后沉香四聖像小蓬萊閣瀛嶼堂金沙井
六一泉餘見御園類

宋時四聖觀前每至昏後有一燈浮水上其色青
紅自施食亭南至西陵橋復回風雨中光愈盛月
明則稍淡雷電時則與雷爭光閃爍此湖光也

蘇子瞻湖中夜泛詩云新月生魄迹未安纔破五
六漸盤桓今夜吐艷如半壁遊人得向三更看三
更向闌月漸垂欲落未落景特奇明朝人事誰料

得看到蒼龍西沒時蒼龍已沒牛斗橫東方芒角
升長庚漁人收筒及未曉船過惟有菰蒲聲菰蒲
無聲水茫茫荷花夜開風露香漸見燈明出遠寺
更待月黑看湖光湖光非鬼亦非仙風恬浪靜光
滿川須臾兩兩入寺去就視不見空茫然其曰湖
光豈即水燈之類歟 高疎寮詩云水明一色抱
神州雨壓輕塵不敢浮山北山南人喚酒春前春
後客凭樓射熊館暗花扶屐下鵝池深柳拂舟白

髮邦人能道舊君王曾奉上皇遊

西湖志

西太乙宮

舊四聖觀園理宗朝建今黃庭殿乃昔涼堂也兩
壁蕭照畫尚存亭觀名並見御園類 弁陽詩云
藥宮廣殿號黃庭突兀浮雲最上層五福貴神留
不住水堂空照九枝燈有和靖墓瑪瑙坡陳朝栢
林逋墓在孤山之陰紹興十六年建四聖延祥觀
畫徙諸院刹及士民之墓獨逋墓詔存之勿徙咸

淳間賈似道題石曰和靖先生墓命金華王庭書
之元胡僧楊璉真伽發其墓惟端硯一枚玉簪一
枝成化十年郡守李端崱治通嘗作梅花詩一聯
為士林羨頌而他詩亦多清逸比其卒也四壁蕭
然題詩云湖外青山對結廬墳前修竹亦蕭疎茂
陵他日求遺稿且喜曾無封禪書時人咸重其節
介而范公希文與公雅厚贈詩云巢由不願仕堯
舜豈遺人又云風俗因君厚文章到老醇其激賞

如此 西湖志

逋仙所養鶴名鳴臯所養鹿名呦呦雖不甚奇亦

是西湖故實 逋鳴臯詩云臯禽名祇有前聞孤

引圓吭夜正分一啖便驚寥泐破亦無閒意到青

雲 又呦呦詩云深林槭槭分行響淺葑葑茸茸疊

浪痕春雪滿山人起晚數聲低叫喚籬門 茅元儀青先

四面堂


處士橋 以和靖得名

涵碧橋

菊磧墓 名九萬葬孤山後談家山

斷橋

又名段家橋萬柳如雲望如裙帶白樂天詩云誰
開湖寺西南路草綠裙腰一道斜



增補武林舊事卷六

欽定四庫全書

史部

增補武林舊事卷七

詳校官太常寺少卿臣陳桂森

編修臣程嘉謨覆勘

覆校官編修臣莊通敏

校對官中書臣李荃

謄錄監生臣王焜

欽定四庫全書

增補武林舊事卷七

宋周密原本

明朱廷煥補

湖山勝槩下

北山 吳山

北山路

補二十條

自豐樂樓北沿湖至錢塘門外入九曲路至德勝
橋南印道堂小溜水橋黃山橋掃帚塢鮑家田青
芝塢玉泉駝巘棲霞嶺東山衙霍山昭慶教場水

磨頭葛嶺九里松靈隱寺石人嶺西溪路止三天

竺附

柳洲

龍王廟 名會靈所謂柳洲五龍王也

惠明院 舊名資福今呼柳洲寺其地舊為通元菴

上船亭

養魚莊 楊郡王府

環碧園 楊郡王府堂扁皆御書

迎光樓 張循王府

劉氏園 內侍劉公正所居

一清堂 後改玉蓮競波爭標於此

菩提院

舊名惠嚴與昭慶寺相連有靈感大悲像閣綠野
白蓮堂碧軒四觀軒南漪迎薰澄心涵碧玉壺瓊
璠今廢

玉壺御園

楊和王水閣

賈府上船亭

錢塘門上船亭

秀邸新園

謝府園

有一碧
萬頃堂

隱秀園

劉郡
王府

先得樓

即古望湖樓坡詩云
望湖樓下水連天是

也

擇勝園

秀邸有御書擇
勝愛閒二堂

九曲城下

法濟院

舊名觀音院
有明奧二軒

五聖廟

有蘇漢
臣畫壁

妙因院

元係慈
光菴

寶嚴院

真覺尼院

元係德
靜菴

錢氏園

華亭
錢府

新嶽廟

東湖道院

關王廟

舊滿路種桃
號半道紅

古北關

楊府解字

楊郡王府
今捨為寺

玉虛觀

崇果院

德勝橋南
舊名羅漢

印道堂

趙郭園

羅漢院

史府今為慧日寺

水丘園

西隱精舍

豐樂院

鐵佛寺

梅岡御園

張氏園

王氏園

小溜水橋

精進院

齊宮舊名精修

延慶院

澄寂院

桃花街

黃山橋

掃帚塢

萬花小隱

謝府園

常清宮

沂王功德

聚秀園

楊府

鮑家田

秀野園

謝府

南禪資福尼寺

極樂尼寺

思故塔

屠虛聖昭廟

廣慧侯

資壽院

元係大聖卷

明覺院

舊名報先有虛心軒

永菴

閩府

萬安院

舊名清化永安

慈聖院

舊名慈雲潘李二貴妃殞所有聖水池大旱不涸

羅寺

妙智院

舊名報國觀音

玉泉淨空院

泉色清澈蓄大金魚有龍王祠

西觀音山

青芝塢

愍忠資福普向院

楊和王建專充殿前諸軍功德及為諸軍葬

上關寺

內侍問少師功德名崇先顯慶

竹所

杜北山墓

汝能字叔謙太后諸孫居翹院能詩有聲

天清宮

女冠

靈峰院

裴氏功德

裴墳

有雙節亭

駝嶽嶺

靈耀觀

西峰淨嚴院

感義郡王功德

大明院

圓明崇福禪寺

岩阿有井泉極清冽內侍

霍汝弼功德

棲霞嶺

神仙宮

有偃松如龍名御愛松

乾濕水洞

有一寺在側

淨元觀

妙明院

東山衙

不空院

舊名傳經

永安院

元係吳秦王府香火菴有青芬亭

護國仁王禪寺

後有龍洞龍王祠在焉

西靖宮

女冠

寧國院

廣照院

霍山

長慶院

舊名華嚴菴
主張王香火

張王廣惠廟

永慶院

光相塔院

山水
甚奇

湧泉

高宗嘗
取淪茗

清心院

舊名
湧泉

瑤池園

呂氏

金輪梵天院

舊名金輪寺
後即巾子峰

寶勝院

舊名
應天

金牛護法院

洞明菴

天龍洞

道者開無
門所居

雲洞園

楊和王府有萬景天全方壺雲洞瀟碧天機雲錦
紫翠間濯纓五色雲玉龍玲瓏金粟洞天砌臺等
處花木皆蟠結香片極其華潔盛時凡用園丁四
十餘人監園使臣二名

大昭慶寺

與前菩提寺相連舊
名菩提寺有戒壇

昭慶律寺晉天福間吳越王建宋乾德二年重修
太平興國三年建戒壇於寺中每歲三月三日海
內縉流雲集於此推其長老能通五宗諸典者登

壇說法敷陳具戒其徒跪而聽之名曰受戒至今
行之天禧初有圓淨法師學廬山慧遠結白蓮社
縉紳之士與會者二十餘人運使孫和為之記南
渡後以其地為策選鋒軍教場尋復為寺

西湖志

策選鋒教場

古柳林

錢塘縣尉司

舊有平湖軒英遊閣又有片石周益公字之曰竒
俊蓋相傳為王子高舊居故也

葛嶺路

水磨頭

石函橋

有水閘泄湖水入下湖

唐刺史李泌建有水閘泄湖水以入下湖沿東西馬騰羊角埂至歸錦橋凡四派白樂天記畧云北有石函南有笕決湖水一寸可溉田十五餘頃每一復時可溉五十餘頃其去郡別州民詩云耆老遮歸路壺漿滿別筵甘棠無一樹那得淚潸然

稅重多貧戶農饑足旱田惟留一湖水與汝救荒

年 西湖志

放生亭

德生堂

理宗御書

泳飛亭

理宗御書

總宜園

本張太尉後歸趙平遠淇今為西太乙宮

大吳園

小吳園

水月園

紹興中賜楊和王孝宗撥賜嗣秀王水月瀛燕堂

玉林堂皆御書

兜率院

葛嶺

葛仙常往來於此
故得名亦名葛塢

十三間樓相嚴院

舊名十三間樓石佛院東坡守杭日每治事於此

有冠勝等軒

大石佛院

舊傳為秦王纜船石俗名西石頭宣和中僧思淨就石鑄成大佛半身或云下通海眼

僧思淨當兒時見之作念曰異日出家當鑄此石

為佛及長為僧妙行寺遂鑄石為半身佛像飾以黃金構殿覆之遂名為大石佛院至元間院燬永

樂間重建

西湖志

保叔塔崇壽院

咸平中僧永保修故得名有應天塔極樂菴落星石石獅峰又名巾子峰及石屏風在焉碑刻舊有屏風院記封山記

寶稷山

敷惠廟

多寶院

舊名寶積
有綠陰堂

嘉澤廟祠

水仙有薦
菊泉及亭

孫花翁墓

惟信字季蕃隱居湖山棄官自放詩詞尤工趙節
齋葬之劉後村為誌杜清獻為文以祭

普安院

挹秀園

楊駟
馬

秀野園

劉郡王有
四并堂

上智果院

有參寥泉東坡
題梁廣王殯所

智果院舊有參寥僧其時有僧道潛者號參寥子

於潛人通內外典能詩蘇子瞻守黃州參寥子自
吳中訪之夢與賦詩有寒食清明都過了石泉槐
火一時新後七年子瞻守杭州參寥子始卜居智
果院有泉出石縫間甘冷宜茶寒食之明日子瞻
與客泛舟自孤山來訪參寥子汲泉鑽火烹黃柏
茶適符所夢遂記以刻石為之銘云

西湖志

治平寺

有錦塢
烟雲閣

壽星院

有寒碧軒此君軒觀
臺杯泉平秀軒明遠

堂東坡祠

及詩刻

江湖偉觀

即觀臺舊址盡
得江湖之勝

寶雲菴

舊名千光王寺邳王殯所有寶雲菴清軒月窟澄
心閣南隱堂妙思堂雲巢今不復存又有靈泉井
寶雲菴初陽臺亦廢

瑪瑙寶勝院

昔在孤山後改為四聖觀遂遷于此有中庸子陶
器墓乃法惠法師智圓自號也有高僧閣僕夫泉
舊有閒泉僕夫泉僧智圓所鑿也智圓字無外錢

塘人博學勵行號中庸子時王文穆公罷相知杭
州諸僧出迓慈雲禪師邀之皆往圓以疾辭曰傾
山倒壑奔走紅塵暫留坐鎮諸僧赧服與處士林
逋為友臨化命門人即後山斂陶器而護葬之名
陶器塚自為銘曰清淨本然無變無遷為藏陶器

密邇間泉

西湖志

養樂園

賈平章有光潒閣春雨觀瀟然養樂堂嘉生堂生

意生物之府

玉清宮

有葛仙
鍊丹井

半春園

史衛
王府

小隱園

史
府

集芳御園

後賜賈平章內有假山石洞通出湖濱名曰後樂

園有蟠翠雪香翠巖倚繡挹露玉蘂清勝已上皆

高宗御題亦集芳舊物也西湖一曲奇勛理宗御

書秋閣遂初容堂度宗御書又有初陽精舍警室

熙然臺無邊風月見天地心琳琅步歸舟等不一

香月鄰

廖瑩中國後歸賈相

嘉德永壽教寺

毛娘娘功德有翔泳堂芝

巖

喜鵲寺

即禪宗院以鳥窠禪師得名魏婉儀殯所白樂天
有紫楊花詩

鳳林寺俗呼喜鵲寺唐長慶初禪師圓修居此四
十餘年棲息松上有鵲構巢其傍人遂呼為鳥窠

禪師白樂天守杭州時嘗往叅之曰大師居處甚
險禪師曰大守險樂天曰弟子位鎮山河何險之
有禪師曰心火相搆識浪不停得非險乎樂天服
之西湖志

寶嚴院

舊名垂雲有垂雲亭
借竹軒無量福海

趙紫芝墓

名師秀在
寶嚴院後

定業院

烏窠禪師道場有君
子泉石甌山環峯堂

襲夢

軒

虎頭巖

介于寶嚴
定業之間

施夢川墓

名嵒字仲山吳人能詞精于律呂楊守齋為寺後
樹梅作亭以葬薛梯颺為誌李質房書周州窗題
蓋

仁壽尼菴

招賢寺

上官良史墓

在招賢寺後良史
字季長號淇園

報恩院

舊名報先即孤山六一泉寺後以其地為延祥觀
遂遷於此德國公主殯所

廣化院

舊名永福自孤山遷於此舊有白公竹閣栢堂水
鑑堂涵暉亭凌雲閣金沙井辟支佛骨塔慧琳塔
白公祠堂 黃宜山詩云移自孤山占此山荒涼
老屋萬琅玕櫻桃楊柳空花夢千古清風滿閣寒

快活園

趙氏

水竹院落

賈平章園御書閣曰奎文之閣有秋水觀第一春

思刻亭道院

顯明院

舊名興福保清儀王仲選殯所有鑑空閣綠淨堂

北新路口

棲霞嶺口

嶺上桃花爛燦色如凝霞其北有古劔關蓋左寶雲右仙姑兩山夾峙若劔門然宋立巡司于此有

水一道名桃溪經岳墳前入湖

西湖志

古劍關

棲霞嶺下

岳王墓

岳武穆王飛所葬其子雲亦祔焉 葉靖逸詩云

萬古知心只老天英雄堪恨復堪憐如公少緩須
更死彼土安能八十年漠漠凝塵空偃月堂堂遺
像在凌烟早知埋骨西湖路悔不鷗夷理釣船

林弓寮詩云天意只如此將軍足可傷忠無身報
主寬有骨封王苔雨樓牆暗花風道路香沉思百

年事揮淚灑斜陽 王修竹詩云埋骨西湖土一
丘殘陽荒艸幾經秋中原望斷因公死北客猶能
說舊愁

武穆王墓自國初以來墳漸傾圮江州岳士迪於
王為六世孫與宜興州岳氏通譜合力以起廢廟
與寺復完美久之王諸孫有為僧者居墳西復為
廢壞天台僧可觀訴於官時何願貞為湖州推官
柯九思以書白其事田之沒於人者復歸然廟與

寺無寸椽片瓦會李君金初為杭總管府經歷慨然以興廢為已任而鄭元祐為作疏郡人王華父一力興建寺廟又復完美杭州申明浙省轉咨中書以求褒贈適趙子期在禮部倡義奏聞降命勅封並如宋止加保義二字自我元統一函夏以來名人佳士多有詩弔之不下數十百篇

陶宗儀輟耕錄

褒忠演福院

元係智果觀音院後充岳鄂王香火岳雲所用鐵

鎬猶存

沖虛宮

舊名寧壽菴

耿家步

東山衙口

福壽院

旌德寺子院有寧宗御書桂堂二字

廖葑洲園

有花香竹色心太平相在世緣愛君子習說等亭

小石板口

九里松一字門

唐刺史袁仁敬守杭日植松於左右各三行門扁

吳說書高宗嘗欲易之自以不及但金飾其字

吳說字傳朋錢塘人高宗紹興以來雜書游絲書
惟錢塘吳說說知信州日朝辭上謂曰朕有一事
每以自歎卿書九里松牌甚佳向自書易之終不
迨卿所書當令仍舊是日降旨俾根尋舊牌張挂

書史會要

駝巘嶺口

石板巷口

麴院巷口

行春橋

小行春橋

忠勇廟

統制
張祠

左軍教場

馬三寶墓

在教場內傳云向曾欲去之有黑蜂數百自墓中
出不可向遂止至元十五年六月內有軍廝名狗
兒者因樵採墾土得一鐵券上有字云鴈門馬氏
葬於橫衝橋云後又有十字至元十五六狗兒
壞我屋蓋古人知數者耳始知行春橋本橫衝橋
云

三藏塔院

明真宮

女冠今改為三藏寺

資德廟

慕容貴妃香火

萬壽院

南山白雲宗建

唐家衎

後澗溪

紫芝道院

道士陳崇真

瑞岡塢

燕脂嶺

以土色得名

晉福教寺

崇壽院

崇親資福院

張淑妃香火

天申萬壽圓覺教寺

舊為了義法師塔院有歸雲堂三昧正受閣並高

宗御書累朝臨幸有御座御榻理宗御書清涼覺地

石獅子路

香林園

斑衣園

韓府

金沙澗

靈竺之水自此東入於湖

顯慈集慶教寺

閣貴妃香火寺扁殿閣皆理宗御書有月桂亭甚

佳金碧為湖山諸寺之冠

閻氏鄞縣人明艷絕倫後宮為之奪寵寺額皆御

書巧麗冠於諸刹經始之辰內司分市材木於郡
縣旁緣為奸望青採斫鞭笞追逮雞犬不寧雖勲
臣舊輔之墓皆不得自保或作詩諷之曰合抱長
材卧壑深于今惟恨不空林誰知廣厦千斤斧斲
盡人間孝子心其後恩數漸隆雖御前五山亦所
不逮一日忽於法堂鼓上得大字一聯云淨慈靈
隱三天竺不及閻妃好面皮於是行下天府緝捕
其人終不得

西湖志

靈隱天竺寺門

俗呼二寺門表居中書白樂天詩一山門作兩山門兩寺元從一寺分正此也

合澗橋

靈竺二山之水會合于此

龍脊橋

武林山

又曰靈隱山又曰靈苑山又曰仙居山上有五峰曰飛來曰白猿曰嵇留曰月桂曰蓮華山前有澗即武林泉也

呼猿洞

龍泓洞

有蔣之奇篆字前後諸賢題字極多二洞在飛來峰

龍泓洞一名通天洞俗傳其底可通浙東有採乳石者入之聞江濤浪浪然槽聲聒然壁間有蔣之奇篆書賈似道廖瑩中等題名宋咸通中有高士丁飛者字翰之居洞中讀書採藥力田自給年七

十二矣操縵岳斤斷陟峻如飛嘗月夜登巖鼓瑟
流淙協奏天籟淒冷往往致鸞鶴之翔集

西湖志

飛來峰界乎靈隱天竺兩山之間蓋支龍之秀演
者高不踰數十丈而怪石林立青蒼玉削若駭豹
蹲獅筆卓劍植衡從偃仰益玩益竒上多異木不
假土壤根生石外矯若龍蛇鬱鬱然丹葩翠蕤蒙
冪聯絡冬夏常青烟雨雪月四景尤佳其下巖扃
窈窕屈曲通明壁間布鎬佛像皆元浮屠楊璉真伽

所為也晉咸和元年西僧慧理登而嘆曰此乃中
天竺國靈鷲山之小嶺不知何以飛來仙靈隱窟
今復爾否因樹錫結菴名曰靈隱命其峰曰飛來

西湖志

女兒山

一名玉女巖

青林巖

理公巖

乃靈隱開山慧理法師在靈鷲寺後

冷泉

有亭在泉上冷泉二字乃白樂天書亭字乃東坡

續書詩扁充棟不能悉錄 林丹山詩云一泓清
可浸詩脾冷煖年來只自知流向西湖載歌舞回
頭不似在山時

冷泉亭建於唐至宋郡守毛友拆去之今所建又
不知起於何時其自叙云昔人加亭於冷泉如明
鏡中加繪畫山翠水光去者過半拂拭留翳舊觀
還復夫冷泉亭之景白樂天極其褒頌而毛守以
為去之乃佳好尚不同如此

西湖志

西湖今但知有冷泉而不知有溫泉醴泉在冷泉之上楊廉夫西湖竹枝詞家住西湖新婦磯又石新婦下水連空飛來峰前山萬重郊九成竹枝詞風篁嶺頭西日暉青龍港口新月微馮士頤詞請看雙投橋下水新開兩朵玉芙蓉皆遺逸隱蹟

藝衡留青日札

溫泉醴泉

二泉在冷泉之上

葛塢

朱野

侯仙亭

壑雷亭

觀風亭

又有虛白見山表君紫薇翠微石橋月桂等亭及
丹竈隱居許邁思真三堂連巖棧伏龍澗等今皆
廢

景德靈隱禪寺

相傳靈隱禪寺乃葛仙翁書或云宋之間書景德
中續加景德二字有百尺彌勒閣蓮峰堂方丈曰

直指堂千佛殿延賓水閣望海閣理宗御書覺玉
寶殿妙莊嚴域又有巢雲亭見山堂白雲菴松源
菴東菴等在山後尤幽寂可喜

杭州内外及湖山間唐已前三百六十寺錢氏立
國宋南渡增為四百八十海內都會未有加於此
者僧派三曰禪曰教曰律今講寺即宋之教寺也
嘉定間品第江南諸寺以餘杭徑山寺錢塘靈隱
寺淨慈寺寧波天童寺育王寺為禪院五山錢塘

中天竺寺湖州道場寺温州江心寺金華雙林寺
寧波雪竇寺台州國清寺福州雪峰寺建康靈谷
寺蘇州萬壽寺虎丘寺為禪院十刹以錢唐上天
竺寺下天竺寺温州能仁寺寧波白蓮寺為教院
五山錢唐集慶寺演福寺普福寺湖州慈感寺寧
波寶陀寺紹興湖心寺蘇州大善寺北寺松江延
慶寺建康瓦棺寺為教院十刹杭州律院則昭慶
寺六通寺法相寺菩提寺內外靈芝寺不在五山

十刹之列大抵僧家以禪那為宗旨而教所以致
禪蘇子由有言我觀世教師皆謂教是實由謂教
實故則為禪所訶禪雖訶乎教終以教致禪禪若
不取教是杜所入門教而不知禪是不識家也律
則慎擗威儀涵養智定禪與教所兼資焉

西湖志

北高峰塔

在靈隱寺山後絕頂比南高峰尤高上有五顯祠
遠近祝香四時不絕

唐天寶中建會昌中燬錢王修復之宋咸淳七年
復燬羣山屏列湖水鏡淨雲光倒垂萬象在下漁
舟歌舫若鷗鳧出沒烟波遠而益微僅覩其影西
望羅刹江若匹練新濯遙接海色茫茫無際郡城
正值江湖之間委蛇曲折左右映帶屋宇鱗次艸
木雲翁鬱鬱葱葱悉歸眉睫山頂舊有望海閣今
廢 蘇子瞻詩云言遊高峰塔尊食治野裝火雲
秋未衰及此初旦涼霧霏巖谷暝日出艸木香嘉

我同來人久便雲水鄉相觀小舉足前路高且長
古松攀龍蛇怪石坐牛羊漸聞鐘磬音飛鳥皆下
翔入門空無有雲海浩浩茫茫惟見聾道人老病時
絕糧問年笑不答但指空藜床心知不復來欲歸

更徬徨贈別留足布今歲天早霜

西湖志

法安院

舊名廣嚴唐韜光禪師築菴于院後有清獻東坡

題名

保寧院

舊名保安
無量壽

資聖院

舊名大明開
山咸澤禪院

韜光菴

韜光禪師道場與樂天同時周伯弼有詩前後諸
賢留題甚多舊有僧嘗於此降仙請至釋子蘭以
下十人凡七十三釋皆唐人能詩者各書一詩語
極奇絕曲盡其景今詩尚存壁間

韜光禪師蜀人唐太宗時辭師出遊師囑曰遇天
可前途巢即止師遊靈隱山巢溝塢值白樂天守郡

悟曰此吾師之命我也遂卓錫焉樂天聞之遂與
為友題其堂曰法安 嘗以詩招之入城云白屋
炊香飯葷膾不入家瀟泉澄葛粉洗手摘藤花青
芥除黃葉紅薑帶紫芽命師相伴食齋罷一甌茶
韜光不赴報之詩云山僧野性好林泉每向巖
阿倚石眠不解栽松陪玉勒惟能引水種金蓮白
雲乍可來青嶂明月難教下碧天城市不能飛錫
去恐妨鶯囀翠樓前有金蓮池烹茗井壁間有

趙閱道蘇子瞻題名

西湖志

永福寺

隆國黃夫人功德咸淳九年建在靈隱西石筍山下

石筍普圓院

天福二年黃氏重修舊名資嚴山有石如筍高數十丈故名石筍寺有超然臺金沙白沙二泉鄴公卷杭守祖無擇愛此山之勝結菴于此取公所封

名之方丈左右金漆板扉皆趙清獻諸賢蘇秦陳
黃留題及文與可竹數枝如張總得父子吳傅朋
等題字甚多歲久暗淡猶隱隱可見寺極清古幽
邃為湖山諸刹之冠後隆國黃夫人以超然臺為
葬地遂移此院于山之西而古意不復存矣

天聖靈壽院

僧德賢建

鐵舌菴

隆親永福院

溫國成夫人香火今廢

時思薦福寺

吳益王墳寺舊以下竺為墳寺後以古刹遂別建
于此高宗嘗臨幸吳太后手書金剛經有楊太后
跋及高宗御書心經竝刻石藏下竺靈山塔下益
王神道碑蔣燦書甚佳墓前二石馬琢刻如生舊
傳夜輒馳驟其鞅轡光瑩如玉至今苔蘚不侵寺
有宜對亭雙珠亭萬玉軒湖山至此極幽邃矣

黃妃墓

錢王
妃

卓筆峰

明惠尼院

舊名定惠錢
王孫妃香火

石人嶺

一名馮公嶺形如
人狀雙髻宛然

海峰卷

無著禪師塔

舊有無垢院韓平原以為壽地遷院於靈石山側
後楊郡王復取為壽地遂啓其塔乃陶龕容色如
生髮垂至眉指爪皆遶身舍利無數留三日不壞
竟茶毗之 僧肇淮海有詩云一定空山五百年
不須惆悵啓顛瓢路邊多少麒麟塚過眼無人贈
紙錢今地為永福所有

西溪路

畢官師墓

畢再遇之父
子皆葬于此

三天竺

自靈鷲至上
竺郎常嶺止

陳明大王廟

漢熹平餘杭令陳渾後唐長興中封太平靈衛王

靈鷲興聖寺

惠理法師卓錫之地吳越王建有靈山海會閣理
宗御書理公巖滴翠軒九品觀東坡祠東坡題名

隋觀法師塔

下竺開山
祖師真觀

下天竺靈山教寺

在隋號南天竺五代時號五百羅漢院祥符初號
靈山寺天禧復名天竺寺紹興改賜天竺時思薦
福為吳秦王香火慶元復今額有御書閣藏仁宗
及中興五朝御書曲水亭前塔跳珠泉枕流亭適
安亭清暉亭九品觀堂石面靈桃石蓮花水波石
悟侍者塔並祠草堂西嶺卧雲石石門澗神尼舍

利塔日觀菴方丈曰佛國山法堂二字乃雲房鍾
離權書甚奇古金光明三昧堂神御殿瑞光塔普
賢殿無量壽閣回軒亭七葉堂谷兒亭大悲泉重
榮檜葛仙丹井白少傅烹茶井石梁翻經臺望海
閣香林亭香林洞無根藤鬪雞巖夜講堂登嘯亭
靈山後塔慈雲懺主榻七寶普賢閣旃檀觀音瑞
像有記大抵靈竺之勝周回數十里巖壑尤美實
聚於下天竺寺自飛來峰轉至寺後諸巖洞皆嵌

空玲瓏瑩滑清潤如虬龍瑞鳳如層華吐萼如斂
穀壘浪穿幽透深不可容貌林木皆自巖骨拔起
不生而生傳言茲巖韞玉故腴潤若此石間波紋
水迹不知何時有之其間唐宋遊人題名不可殫
記覽者顧景輿懷云

天竺桂子之說起自唐時然宋慈雲式公月桂詩
序云天聖丁卯秋八月十五夜月有濃華雲無纖
迹靈隱寺殿堂左右天降靈寶其繁如雨大如豆

圓如珠白者黃者黑者殼如芡實味辛識者曰此
月中桂子也拾以封呈好事者餘播種林下越數
月移植白猿峰凡二十五株遂改回軒亭為月桂
亭又張君房為錢塘今夜宿月輪山寺僧報曰桂
子下塔遽起望之紛如烟霧回旋成穗散墜如牽
牛子黃白相間咀之無味則桂子之落往往有之
但人不識耳漢武洞冥記云有遠飛雞朝往夕還
嘗銜桂子歸于南土南土月路固其宜也所以北

方無之又本草圖經云江東諸處多於衢路拾得
桂子北土獨無者非月路也

西湖志

吳越孝獻世子墓

文穆王子

楓林塢

永清寺

薛開府居
正香火

中天竺天寧萬壽永祚禪寺

隋開皇千歲寶掌和尚開山建寺吳越時名崇壽

院政和中改賜今名有摩利支天像華嚴閣如意

泉

彌陀興福教院

皇子光州
二王殯所

顯親多福院

舊名
光福

大明寺

元係興
國菴

上天竺靈感觀音院

天福中建名天竺看經院咸平初賜今名淳祐中

賜廣大靈感觀音教寺舊寺額蔡襄書後理宗易

以御書外山門乃蔡京書紹興乾德淳熙皆嘗臨

幸有十六觀堂應真閣超諸有海理宗御書有雲

漢之閣藏累朝所賜御書兩峰堂白雲堂中即堂

清華軒延桂閣秋芳閣伴雲閣前後賜珠冠玉爐
珍玩甚多每水旱朝廷必禱焉外古跡有肅儀亭
梅峰菴琮老橋金佛橋復菴流虹澗夢泉植杖亭
謝履亭凝翠泉觀音泉雲液池孫公亭無竭泉

上天竺寺觀音像長不盈五尺而疊著靈異官民
信奉甚恭凡旱潦禱之必應當攷釋氏紀錄云後
晉天福己亥僧道翌一日見山間光明往視之得
奇香木命良工刻成觀世音菩薩像白光煥發繼

以晝夜後漢乾祐戊申有僧從勲以古佛舍利置
毫相中舍利時現冠頂宋咸平庚子浙西自春徂
夏不雨給事中知杭州張去華率僚屬具幡蓋鼓
吹迎禱于梵天寺繼時靈雨四境沛足如此則自

陶宗儀輟耕錄

有像已四百餘年其所由來遠矣
紹興五年夏大旱朝廷遍禱山川祠廟不應遣臨
安守往上天竺迎靈感觀音於法惠寺建道場滿
三七日又弗應時六月過半矣苦行頭陀潘法慧

者默禱于佛乞焚右目以施取鐵彈投諸火煨置
眼中燃香其上香焰纔起大雨傾注法慧眼即枯
後三日夢白衣女子來欲借一隔珠拒不許二僧
在傍曰與伊不妨自令六六送還既覺不曉所謂
又夢二僧來請赴六通齋白衣女子亦至在前引
道稍前進則山川蔚然百果皆熟紛紛而墜慧就
地拾果食之覺心地清涼非常日比又俯首欲拾
間女子忽面擲一彈正中所燃目失聲大呼而寤

枯厓內已有物若鶩眼瞻視如初漸亦復舊數其
再明之時恰三十六日始悟六六送還之兆善惡記

雙檜峰

白雲峰

乳竇峰

楊梅嶺

郎當嶺

出湧金門北為豐樂樓錢塘門瀕湖為玉蓮堂北為來
鵲樓西過流水橋為昭慶律寺寺北為慶忌塔寺西過
石函橋為放生亭又北過羊坊橋小溜水橋為靈衛廟

過石函橋西為寶石山崇壽禪寺寶所塔壽星石石屏
風獅子峰屯霞石看松臺乳泉井一勺泉寶石山麓為
大佛禪寺沁雪泉西為智果禪寺參寥泉又西為顯功
廟為錦塢初陽臺葛翁井又西為寶雲山瑪瑙講寺後
僕夫泉又西為葛嶺葛稚川墓前為四聖延祥觀竹閣
西為虎頭巖嘉德永壽講寺又西為鳳林禪寺君子泉
嶺西為履泰山棲霞嶺桃溪棲霞洞紫雲洞輔文侯牛
臯墓妙智菴嶺下為岳武穆王墓翊忠祠分屍檜流芳

亭祠後為掃帚塢黃龍洞護國仁王禪寺西為淨性禪
寺履泰西為仙姑山張烈文侯墓仙姑西為青芝塢玉
泉講寺後為靈峰禪寺又北為法華山秦亭山方井佛
禪寺智勝菴東嶽廟青芝塢西南為慶化山水竹塢神
霄雷院仙姑西南為駝巘嶺過行春橋入九里松折而
南為仙芝嶺普福講寺葛翁井西為黑觀音堂又西為
集慶山顯慈集慶講寺又西南過合澗橋為飛來峰龍
涎洞青林洞玉乳洞射旭洞靈鷲塔過回龍橋為石門

澗冷泉亭靈隱山北高峰靈隱禪寺山半為石笋峰茯苓泉韶光菴靈隱寺西為栗山石人嶺玉女巖過嶺為西溪飛來峰西為呼猿洞自合澗橋折而南度佛國山門為下天竺講寺靈鷲峰月桂峰稽留峯蓮花峰三生石翻經臺香林洞葛塢葛井北山葛井凡三相傳此獨為得道處也神尼舍利塔寺畔舊有七寶普賢閣日觀菴西嶺艸堂七葉堂九品觀堂俱不可復尋又南為楓木塢中天竺禪寺千歲巖對中竺為永清塢心菴西南

過肅儀亭為上天竺講寺乳竇峰獅子峰雙柱峰白雲
峰天香巖夢泉大悲泉如意池出寺折而東南為幽淙
嶺捫壁嶺活沙塢再上為天門此北山之勝也

張洙北

名山勝紀

吳山

增

春秋時為吳南界以別于越故曰吳山或曰以伍
子胥故訛伍為吳故郡志亦稱胥山在鎮海樓之
右蓋天目為杭州諸山宗翔舞而東結局鳳凰山

其支山左折遂為吳山派分西北為寶月為蛾眉
為竹園稍南為石佛為七寶為金地為瑞石為寶
蓮為清平總曰吳山奇萼危峰澄湖靚壑江濤海
門回環拱固扶輿淑麗之氣鍾焉是以邑居叢集
華艷工巧殆十萬餘家聲甲寰宇恢然一大都會
也其陟山之徑有門曰登高覽勝石磴斗折可數
百級許元時平章達爾罕托歡所甃也立而環眺
則官司廨署衛鎮崇嚴闌闔街衢紅塵霧起市聲

隱振漏盡猶喧道院僧廬晨鐘暮鼓青樓畫閣雜
以笙歌升其巔則縹緲凌虛碧天四匝山川包界
脉絡縷分或昂而為首或穹而為脊或掉而為尾
若斷若聯運掌可數 楊仲宏吳山晚眺詩云山
椒暈構四垂寬上相旌旗會覽觀旁近江湖天廣
大上連星斗界清寒龍宮永鎖函書闕鳳嶺重嗟
苑樹殘此際獨無雲蔽日正宜翹首望長安 西湖志

寶月山

舊志叙城內諸山以此山為首蓋以地蟠中輔對峙藩司為一城之鎮也東北為蛾眉山又東為淺

山正東為金地山上有城隍廟

杭州府志

蛾眉山

在寶月山西有八眼井

竹園山

在吳山西相接一脈獨趨而北隱隱隆起陰陽家謂為府治之主山宋臨安尹趙與憲建閣其上平瞰西湖扁曰竹閣理宗御書景定三年徙其閣而

山亦漸夷為地

杭州府志

石佛山

西聯寶山南面瑞石舊有大乘石佛寺宋嘉熙間僧鑿石為三佛元至正間河西僧多爾濟募緣壯嚴建寺居之改名智果院

西湖志

寶山

東接石佛山蘇子瞻同秦仲二子遊寶山詩云平明已報百吏散半日來陪二子閒立鶴低昂烟

雨裏行人出沒樹林間

西湖志

七寶山

在宋天慶觀後今白馬廟巷之西舊有寶嚴院廣

嚴院櫻桃園竝廢

西湖志

寶嚴院

唐清泰二年錢氏建名瑞龍宋治平二年改今額

有垂雲亭借竹軒秦少游曾宿軒中夢天女以維

摩像求贊淳祐間建佛閣理宗書無量福海四字

扁之蘇子瞻佐郡時有雲閣黎者寓院中閉戶十
五年謝絕人事日禮觀音經忽一日留偈端逝偈
云誦經一字禮一拜頭白眇眇坐塵界天雞臨夢
啼一聲明月一輪觀自在 蘇子瞻弔之詩云雲
師來寶山一住十五秋讀書嘗閉戶客至不舉頭
去年造其室清坐忘百憂我初無言說師亦無對
酬今來復扣戶空房但颺颺云已滅無餘薪盡火
不留却疑此室中常有斯人否所遇孰非夢事過

吾何求

西湖志

三茅寧壽觀

在七寶山東北本三茅堂相傳三茅君長盈次固
季衰秦初咸陽人得道成仙自漢以來崇祀之宋
紹興二十年因東京舊名賜額曰寧壽觀并畀古
器其一漢鼎高尺有九寸廣尺兩耳旁出曲上二
尺牛首識云有漢建元三年八月作牛鼎祀太室
銘曰惟甲午丙寅帝若稽古肇作宋器審厥象作

牛鼎格于位室從用饗億寧神休惟帝時保萬世
其永賴其一唐鐘識云丙辰九月二十四日常州
澄清觀女冠王玉仙作河東薛泚為之銘曰上德
願而鑄洪鐘仙聖依而神仙從霜朝聞兮窈窕月
夜聽而春容蓮花生而腰淨頂銜繞于盤龍響上
徹于天外聲下徹于九重庶長空于鬼獄魔屏跡
而潛踪其後忽失所在紹興間有鐘震于太湖濱
湖繼黃競舟迎之獨澄清觀舟至凌波而上一引

山之視之乃本觀唐時物也守臣以獻賜之觀中
盛徵雲表孝宗朝出金帛度牒易之置禁中洪武
七年三月錢塘知縣朱復以廢銅鎔之其一褚遂
良小楷陰符經景定庚申理宗以賞似道有江漢
功賜金帛百鉅萬不受詔就觀取陰符經酬之觀
毀於元至元辛巳洪武初重建成化十年建昊天
宮宮宇暈飛金碧騰煥環盼江湖渺歸隄底

西

雲居聖水

雲居菴者宋元祐間僧了元建聖水寺者元元貞
間僧明本建明本立約其徒不置恒產惟資化緣
為僧家風味至大間沙門指月拓基廣之掘地四
尋得胥井甃甃堅好中有佛首三枚諸相具足遂
塗金事之名曰三佛泉巴西鄧文原為之銘曰我
觀大地積水所載孰疏鑿是太虛無外掘地及泉
視之縈帶如履冥塗破諸障礙其源淵谷其瀉湍

瀨不止不流以與井會瑞相見前示我三昧彼壞者石實相不壞是實相故遍恒沙界以一勺甘除世渴愛是相是水無在不在我作銘詩以警盲聵洪武二十四年併聖水于雲居賜額曰雲居聖水了元號佛印善誦諧以禪為戲明本號中峰又號幻住博涉經史洞徹法源為文操筆立就祝髮時有故宋宮人楊妙錫者以香奩貯髮舍利叢生遂建塔寺中久廢成化間僧文紳修復有小像一幅

神氣如生相傳為中峰自寫上有贊云幻人無此
相此相非幻人若喚作中峰鏡面添埃塵

西湖志

金地山

舊有妙果
尼寺今廢

瑞石山

秀石玲瓏巖竇窳窳寒泉洎瀝匯為澄泓者往往
而有清幽徹骨空翠撥肌湖山奧區罕與倫比索
駝峰峭削凌空雪風洞豁閉曲徑履烏所涉栩栩
然覺有仙風焉

西湖志

紫陽菴

宋嘉定間邑人胡傑居此建集慶堂元至元間道士徐洞陽得之改為紫陽菴其徒丁野鶴棄俗全真一日召其妻王守素入山付偈云懶散六十年妙用無人識順逆兩俱忘虛空鎮長寂抱膝而逝守素遂奉其屍而漆之端坐如生亦束髮為女冠不下山者二十年 薩天錫贈之詩云不見遼東丁令威舊遊城郭昔人非鏡中人去青鸞老華表

山空白鶴歸石竹淚乾斑雨在玉簫聲斷綵雲飛
洞門花落無人掃獨坐蒼苔補道衣其菴久廢

西

湖志

寶蓮山

與七寶山相連舊有寶蓮寺宋嘉定間楊節使廢
而為園徙寺于豐豫門外

青衣洞

吳山重陽菴有泉曰青衣洞泉臨安志杭州府志

皆以為唐開成間道士韓道古遇青衣童子入洞
故名按洞宋為寧壽觀地韓侂胄鑿山為園作流
觴曲水自青衣下注于壑十有二折緒於閱古堂

前即名泉為閱古

見說
郭

故當時言官論侂胄有剗

造亭館震驚太廟之語蓋宋太廟正當泉下之山
也又考陸放翁閱古泉記記中但言泉之甘寒清
冽鋪叙地景無青衣事又曰泉壁有開成五年道
士諸葛鑑元八分書癸辛雜識載為元年六月南

嶽道士邢令開錢塘令錢華題名道士諸葛鑑元書

俱不言道士韓道古事作記時寧宗嘉泰三年青

衣事必見於嘉泰後咸淳前故陸記無而臨安志

有也二志以為開成非矣洞記以為見於大德丁

酉尤非也恐韓閱古訛而為韓道古未可知若建

菴之日必開成年間鑿石字可證但恐名非重陽

至大德間始有重陽名故石壁又有廣微子書大

重陽菴字

廣微元時
天師也

今菴記曰韓建菴無歲月是

考之不精未知有八分題名石刻故泛云耳惜八分刻歲久石長今不明白未有諸葛鑑元書止有

元書二字

郎瑛七修類藁

至元丁亥九月四日周公謹偕錢菊泉至天慶觀訪褚伯透遂同道士王盤隱遊寶蓮山韓平原故園山四環皆秀石絕類香林冷泉等處石多穿透嶄絕互相附麗有如玉色者取以為環珥之類中有石罅杳而深泉涓涓自內流出疑此即所謂閔


古泉也。洪旁有開成元年六月南嶽道士邢令開
錢塘縣令錢華題名道士諸葛鑑元書鐫之石上。又
南石壁上鐫佛像及大字心經甚奇古。不知何時
為火所燬。佛又殘缺。又一洞甚奇。山頂一大石墜
下。傍有一石承之如餽釘然。又前一巨石不通路
中鑿一門。門上橫石梁。又有一枯池。間石壁皆細
小水波紋。不知何年水直至此處。然則今之城市
皆當深在水底。數十丈深谷為陵。非寓言也。其餘

磴道石池亭館遺址歷歷皆在雖草木殘毀殆盡而巖石秀潤可愛大江橫陳于前時正見潮上如足練然其下俯視太廟執政府在焉山頂更覺奇峭必有可喜可噩者以足憊不果往且聞近日多虎往往白晝出沒不常遂不能盡討此山之勝故書以示好事尋游者觀此篇所序閱古泉諸勝與今不同而石壁鐫字亦漫滅不可讀矣

西湖志

清平山

山在仁孝坊舊有烟霞閣四壁畫古賢像多名人
題詠今廢



增補武林舊事卷七